

**Gbre wáraga bi Páwulo eké zí
Timatiyo
ní
Ledre gi ro gbre búkú bi
Timatiyo ní**

Páwulo eké ledre ba gi simi sígìni. Sómù ledre ené ni kóo kídí niyí go úfu née 'diya. Gi zí kényi née ili kóo zí Timatiyo ógùn é zíne 'diya 'dá'dá zíye kí úfu née. Gi zía bi kóo Timatiyo ndìsì sáká Páwulo kíngaya kí moko ní, zía ídíné zí Páwulo káa zí owù 'bi ené ní, zí 'bú Timatiyo ídíné doa kíngaya.

Páwulo eké ledre ba gi zía bi sinyí roa misínyí gi ro 'yì ga bi 'bi Kírésìto bi niyí ndìsì 'dódo yée bisinyíne ní. Gi zí kényi née zía úku ledre zí Timatiyo idí tóro ngbúó simi ledre 'bi Kírésìto bi ngúnngu ní, ndìsì úku ledre 'bi Lomo zí 'yì e ngìrì ndaá roa wá abú simi sùndì kadra 'bi 'do'dó, idí kpá ndìsì úkucáyi ledre 'bi 'yì 'dódo ledre ga bi 'yì ranga e ní.

¹ Timatiyo, máa Páwulo bi 'Buzé Lomo gelé máa, zíma ídíma káa do 'yìmikása zí Kírésìto Yésù bi ndìsìzé óto komozé kací a gi ro trìdrì bi za fí ní.

² Máéké ledre ba máa zíyì, gi zía, áyí zíma go mbigí owù 'bi amá simi Lomo.

'Buzé Lomo ma'dáa kí Kírésito Yésu Ngére ezé, idíní ndísi lúru bi kacíyí gí do bi zíyí ndísiyí bilámáne.

Páwulo I'bí mbófo éyí zí Lomo gí ro Timatíyo

³ Timatíyo owú 'bi amáa, ledreyí liji máa wá. Kací kadra za mbá, kí'dí bi mááyí go íni ini zí 'Buzé Lomo ní, mándísi óto yíi kó'dú a. Gí zía, ni ne mbigí Lomo, bulúndu bulúnduzé e ndísiní kóo íni ini zía kí mimbé'deyé k'íé do. Kpá káa zí bi ndísiyé karaba íni ini zía kí mimbé'dezé k'íé do ní. ⁴ Máóyó sogomá zíyí wá, mááyí ógú lúru yíi. Máówo bú, simi bi kóo ifizé simizé keyí ní, ni kóo zíyí mongú lerí, néesi ledre bi kóo léfe iní komoyí gí zía kíngaya ní. ⁵ Máówo bú bilámáne kídí, ngúngu ledre Yésu go káa do Ngére eyí cú kí mimbé'deyí káa zí bi kóo tetéyí Lóyisi kí mbágáyí Yúnisi nguṅguní ledre a ní. ⁶ Moko 'bi Lomo bi do síllyí néesi ndaá úyu wá, idí ngbóro tátá roné fú 'dá'dá káa zí bi kóo máí'bí úndru moko máa néesi go zíyí ní. ⁷ Ídí ndísi méngí moko néesi fú kenée ndéré k'íe 'dá'dá, gí zía, 'Buzé Lomo i'bí 'dówúne go zize gí ro zía ndísiné óto zée zize ídize kí roko'buzé, do ndísi tórozé ngbúo simi úzu éyí, zize ndísiyé óto 'bú lafúze e, kpá gí ro zize ndísiyé méngí mbá bilámá ledre e.

⁸ Káa zí bi 'Dówú Lomo ni bo kize, ni ndísi sáká zée ní, ngírí ndaá méngí yíi kí 'dódo ledre 'bi Ngére Yésu zí 'yí e wá. Dokuwu ndaá kpá méngí yíi kí 'dódo ledre ené zí 'yí e gí zía bi kóo otoní máa simi sígini gí ro bilámá ledre ené ní wá. Kací kadra mbá, idí idí nzíyiyí. Togú 'do'dó ogú royí gí zía bi nguṅgu ledre Ngére Yésu ní

yá, ídí ótoómo royí zíyí 'dó'dóyí. Máotoómo kóo romá kpá kenée zíma ndísimá 'dó'dóma gí ro ledre ené. ⁹ Gí zía, wo Lomo, yomo ené kóo zée kéyí kpá kí tų'dų ngíti géyí 'yí e, zíze ídíze káa do mbigí 'yí ené e ba ndáá gí zía bí azé bilámá 'yí e, míméngí ledre ezé e nìyí mbá bilámáye ní wá. Yeme kóo ledre née gí rozé go kú 'desí kpurú gí simi Kírésito Yésu 'dá'dá zía kóo kí ótoógu ere e kí kángá, gí zía, nì yí ené kú Lomo 'yí méngí bilámá ledre zí 'yí e. ¹⁰ Bí ba ní, owoyemezé nda bilámá ledre bí kóo simi bí Kírésito Yésu 'Yí yómo 'yí e bí úyu do mǐngbúngbu kágá gí rozé ní go. Míúrua bí kóo gí simi umbu ní, 'dodo zíze kídí, wo Yésu, roko'bua romo do umbu go. Zée 'yí ga bí 'bí Yésu ma'dáa ní, togú uyuzé yá, Yésu ma'dáa nì úru zée, gí zía, urúutu kóo roné go ne gí simi umbu ma'dáa, roko'bu a romo do 'bí umbu go. ¹¹ Maa Páwulo, 'Buzé Lomo gelé máa káa do 'yímíkása ené, 'yí 'dódo ledre ené kpá 'yí ndísi úku bilámá ledre ené zí 'yí e za mbá. ¹² Née sí ledre bí otoní máa gí zía simi sígìni do ndísi kí 'dó'do máa ní. Abú kenée ndotó, dokuwu menjí ené máa gí zí ledre ga gére née wá, gí zía, máowo bú, mǎngúngu yí amá ledre mbigí Lomo. Wo Lomo ma'dáa nì ndísi yómo máa gí simi 'do'dó ga gére née gí simi odu síndí kadra bí karanée Ngére Yésu nì ndá'baógu simi a ní.

¹³ Owú 'bí amáa, ledre ga bí kóo má'dódo yée zíyí ní, ndaní lígí yí wá. Ídí ndísi 'dódo dųú ledre ga gére née zí 'yí e, simi bí áyí go ndísi méngí ledre máa ga gére ní, ledre Kírésito Yésu bí ngúngu ní, cíyí a ídí ngbóro simiyí mongúne,

zìyì ídíyì kpá 'yì óto 'bú 'yì e za mbá. ¹⁴ Máówo bú, 'Dówú Lomo ni ndìsì sáká yì, zìyì ndìsìyì méngì moko 'bì Lomo do bilámá mìsì'diné.

¹⁵ Máúku ledre née kenée gi zía, éyì bì 'yì 'bì Ásiya mengìní ní, oto máa, mándá kí rokinyi gi roa wá. Lúró aka, Fugélo e kí Amogéno kí ngíti géyì lafúye e, oyóní sogoyé go zì ledre 'bì Lomo bì má'dódo zíye ní. Ndìsìní nda yì eyé go lódú ngíti géyì mìsì'di eyé e kpì.

¹⁶ Abú mengìní kenée ndotó, Onésìforu otoomo máa wá. Tí bì owo bú otoní máa simi sígìní ba gi zía bì mángúngu ledre Yésu ní. Simi ledre ga gére née mbá, Onésìforu otoomo máa wá. Ndìsì kpá fú ngásáogù kí lúró máa, zì mimbé'demá gè ndìsì ìdrìne, zì síli ndìsì ílíne romá. Mámbofo wo go kíngaya simi ledre bì méngì yée zíma née. Ngére Yésu ídí méngì bilámá ledre zía kí 'yì 'bì 'be 'bì ené mbá.

¹⁷ Simi bì ogù simi Róma ní, zì mimbé'dea ídíne 'dága kíngaya gi ro zíne lúró máa. Zía tónóne ndú'yúsó'do ledre gi romá, tí bì zía ógùnè gi zíma do bì bì otoní máa doa ní.

¹⁸ Bilámá ledre ga bì kóo Onésìforu ndìsì méngì yée zíma simi Éfeso née, ndaní mìlò'boyé wá, ówo kóo bú bilámáne. Gi zì kéyì née ní, zíma ndìsímá óto wo kí 'yì 'bì 'be 'bì ené e do sílì Lomo. 'Buzé Lomo kí Ngére Yésu, idíní ndìsì lúró bì kacì a gi ro zía ndìsìné bilámáne.

2

Páwulo énzì komo Timatiyo

¹ Áko Timatíyo owú 'bi amáa, káa zí bi Lomo mengi bilámá ledre go zíyí kpurú gi simi Owú 'bi ené Kírésito Yésu ní, ídí ídí kí roko'buyí, zíyí ndísi tóroyí ngbúo simi ledre e kací kadra za mbá. ² Ledre ga bi kóo lúrútóko gi zíma, mándísi 'dódo yée zí tú'dú 'yí e ní, ídí 'dí'bi ledre máa ga gére née, zíyí 'dódotátá yée zí 'yí ga bi lúru yée utúasání go gi ro 'dódotátá ledre e ní, zíye ndísiyé 'dódotátá yée zí ngíti géyí 'yí e. ³ Ídí ódó mimbé'deyí simi ledre e káa zíze ní, zíyí tóroyí ngbúo káa zí asikíri 'bi Kírésito Yésu ní. ⁴ Bi áyí go asikíri 'bi Ngére Yésu ní, ndá lolu ndísi méngi miméngi ledre 'bi gbékpí 'yí e wá. Ídí ndísi méngi dujú ledre máa yée ga bi Yésu ni ídí kí rokinyi gi royé ní. ⁵ Togú kenée wá, ídí ídí káa zí 'yí bi ndísiní ngásá midogelígélí ní. Lúru, togú 'yí niyí go ngásá midogelígélí kí lafúne e ní, oto ené sómú ledre ené gbre gbre wá. Ni óto komoné dujú ro ngásá bi kó'dúne ní, 'búo togú ngasáonzóní ngásá máa née go.

⁶ Ngíti sómú ledre ni kpá káa, ídí ídí káa zí 'yí bi ni 'yí ó'do éyí kíngaya ní. 'Yí bi ni 'yí ó'do éyí kíngaya ní, ni yí ené lengbe fú lá kí rokinyi. ⁷ Ledre ga bi máúku yée zíyí née, ídí sómú simiyé kpó kpó kpó. Ngére Yésu ni í'bí komokenzi zíyí kpurú gi simi ledre káa zí ga gére née.

⁸ Ídí óto komoyí ro Kírésito Yésu bi ni gi simi kufú ngére Dawídi bi kóo 'Buzé Lomo uru wo gi simi umbu ní. Née bilámá ledre bi mándísi 'dódo a zí 'yí e ní. ⁹ Gi zía bi mándísi 'dódo bilámá ledre née zí 'yí e ní, 'yí máa yée ga

bi ngára iliní bilámá ledre máa née wá ní, zíye ndìsìyé 'dó'do máa kpá kí ónzó máa simi sīgìní káa zí éyì bì mándìsì méngì bisinyí ledre ní. ¹⁰ Abú kenée ndotó, máí'bí romá go zíma 'dó'dóma gì ro 'yì e za mbá, gì do bì zíye ngúnḡu ledre 'bì Kírésìto Yésu, zíye ídíye mbigí 'yì ga bì 'bì Lomo ní za fí.

¹¹ Ma'díi,

togú ootomozé bisinyí ledre ga bì kóo ndìsìzé méngì yée ní mbá 'dá'ba yá,
Yésu ni yómo zée, zía óto zée, zíze ídíze trídrizé za fí káa zíne ní.

¹² Ndaá kpá lá duú wo née wá, togú ụtuzé simizé simi 'do'dó ga bì niyí kí ndìsì méngì zée ní gì simi sīndì kadra bì Yésu ma'dáa ni ndá'baogụ simi a ní yá,
azé ídí dongará 'yì ga bì Yésu ma'dáa ni ídí Ngére doyé ní.

Togú ootomozé wo gì zí 'do'dó bì ndìsìzé ndíki a gì ro ledre ené ní yá,
simi bì karanée ni ndá'baogụ káa do Ngére do 'yìma'dí e do sogo káḡá ona ní, ni ótoómo zée kpá kenée, zía úku ledre kídí, née owo ené zée wá.

¹³ Togú owozé wo káa do Ngére ezé, zíze ndìsìzé lódú kací a yá,
oyólo'bó ené ledre ené wá,
ledre ga bì uku yée ní, ni méngì yée mbá.

'Yì 'bì moko bì Lomo ni kí rokinyi kée ní

¹⁴ Káa zí bì kenée ní, ledre ga bì máúku yée zíyì née, ídí ndìsì úku yée zí 'yì ga bì sì sīlìyì íri ní mbá, ndaní ndìsì méngì kangú simi ledre

'bi Lomo wá. Kangú káa zí bi ngíti géyì 'yì ga gére ndìşiní méngì yéé née, sakání eyé 'yì e wá. Bi ndìşì sinyiní ro 'yì ga bi ndìşiní úwú yéé ní misinyiní. ¹⁵ Máúku zíyì, dokuwu moko 'bi Lomo ndaá méngì yì wá. Ídí í'bí royì ndìşì méngì moko ené kí ndìşì 'dódo bilámá ledre ené zí 'yì e. ¹⁶ 'Yì ga bi ambá ledre eyé lá kangú kí úkucáyi ledre gì do bi ledre 'bi Lomo ní, ndá í'bí royì zíse ndìşisè ítí kangú kéye wá. Gì zía 'yì tara sinyí káa zí ga gére née, ndìşiní lengbe 'dí'bióyó 'yì e gì do misì'di 'bi Lomo 'dá'ba. ¹⁷ Bisinyiní ódro ga bi káa zí bi Amána e kí Philéta ndìşiní ódro yéé emení ngú, ndìşiní 'dí'bióyó ledre 'bi Lomo gì do mimbé'de 'yì ga bi 'bi Kírésìto ní 'dá'ba, zí miméngì ledre eyé nda ndìşì ídìne bisinyiné. ¹⁸ 'Yì ga gére née ukuní eyé ma'díi ledre wá, ambá ledre eyé yì ené lá dọ̀ọ̀ Ẹ̀ngà. Lúru aka lá ledre bi ukuní kídí, 'yì e ndaní lolu óto komoyé gì ro ledre úru gì simi umbu wá, 'yì ga koo uyuní ní, Ngére Yésu uru yì ené yéé go. Ngíti éyì ndaá lolu iri ya úru gì simi umbu wá. Ledre eyé ga gére née ndìşì nda go sinyi sómú ledre 'bi 'yì e kí lódú kací Yésu. ¹⁹ Timatiyo, ídí ówo a bilámáne kídí, ledre 'bi Lomo ndaá owú éyì cúku'dée zí 'yì e ndìşiyé ndéndeke kíe wá. Nì éyì bi Lomo yeme ne kí ledrené owóowó zí 'yì e za mbá ní, “Lomo ma'dáa owo mbigí 'yì ené ga bi ńgunḡuní ledre ené go ní mbá bú.” Kpá kenée, “'Yì bi ńgunḡu ledre Ngére Yésu go ma'díi ní, idí nda ndìşì méngì dọ̀ọ̀ éyì ga bi Yésu ma'dáa ili yéé ní.”

²⁰ Ngíti ledre ni kpá káa, 'yì bí ni do mongú moko kpá kí mongú 'be zíne ní, éyì 'bí éyì miánu ga bí zía 'be ní, niyí kací ríkí sí doyé mbá mǎngúngúcuá. Ngíti géyì 'bí eyé gí simi dábu, ngíti géyì gí simi késí bí ndìşiní rírí mǎrírí ní. Zí ngíti géyì ídí 'bí eyé gí simi kǎngá kpá kí yée ga bí cecení gí simi kágá ní. Éyì ga gére née ndìşiní méngì moko kíye kací şindí kadra eyé e mǎngúngúcuá. Ngíti géyì gí ro mǎngburoko şılı e, zí ngíti géyì ídí 'bí eyé gí ro gbékpí şılı e. ²¹ Ledre née ni kpá kenée gí ro 'yì ga bí i'bíni royé go ndìşì lódú kací Ngére Yésu ní. Togú 'yì otoomo kí méngì bisinyí ledre, zía ndìşiné méngì dụú ledre ga bí utúasání miútúásá ní yá, Lomo ni í'bí moko bí kí ledrené owóowó ní zía, gí zía 'yì ma'dáa née i'bí roné go ndìşì lódú kací Ngére ené Yésu. Gí zí keyì née ní, 'yì máa née ni go kpá nzíyiné gí ro ndìşì méngì ledre ga bí utúasání miútúásá ní.

²² Timatiyo owú 'bí amáa, máúku zíyì fúó, lafúyì ga bí ambá ledre eyé lá dụú bicayi ódro kí bicayi miméngì ledre e ní, ídí ígí royì gí royé 'dá'ba. Ídí ndìşì méngì dụú ledre ga bí utúasání miútúásá ní. Zíyì óto komoyì ro ledre 'bí Lomo kíngaya. Ídísé ndìşì bilámáse kí mimbé'desé kíé'do kí 'yì ga bí i'bíni royé go ndìşì lódú kací Ngére Yésu ní.

²³ Ndaá kpá lá dụú ledre máa yée ga gére née wá, ndá í'bí royì zíse ndìşísé méngì kangú kí 'yì ga gére née wá, gí zía, kangú ndìşì lengbe 'dí'biógú ófú kí okó dongará 'yì e. ²⁴ Ídí óto ledre ba simi doyì. Togú 'yì ni go 'yì kasa 'bí Ngére

Yésu yá, 'yì máa née ndaá lolu 'yì ófú kí 'yì e wá. Nì nda go 'yì bi mímbe'dea nì go bilámáne ro 'yì e za mbá, ambá ledre ené nda go 'bi 'dódo bilámá ledre bi 'bi Lomo ní zí 'yì e. ²⁵ 'Yì ga gére née, bi ndìşiní úkucáyi ledre gi do bi ledre 'bi Lomo ní, ídí 'dódo ledre zíye kpá kí ini ini gi royé. Lomo idí óyóló'bó mímbe'deyé gi ro zíye ówo dujú mbigí ledre ené. ²⁶ Zíye óyóló'bó sómú ledre eyé zíye ídíye nda 'yì lódú kací Yésu. Gi ro zíye ólúóguyé gi sî sîlí ngére 'bi bicayi lomo e, gi zía ndìşiní nda kóo go méngi ledre ga bi Satána ili yée ní.

3

Tú'dú 'yì e niyí karanée óyó sogoyé zí Lomo

¹ Timatíyo, ídí óto ledre ba simi doyi bilámáne, kadra mindá'baogu Yésu nì ídí bisinyíne zí tú'dú ngíti géyi 'yì e. ² Gi zía ndìşiní yì eyé méngi dujú éyi bi bi ndìşí éme royé gi zía ní, do ndìşiyé óto komoyé kpá dujú ro késí eyé ga bi ndìşiní yóko yée ní, zíye ndìşiyé kí ilíye káa zí éyi bi romoní do 'yì e go za mbá ní. Ndaá kpá lá dujú ledre máa yée ga gére née wá, zíye ndìşiyé kí óto 'yì e káa do simi şindíye, zíye 'dútu mbíliye ngbúru kí úwú lorú ga bi 'yì ndíki yée ndìşiní úku a zíye ní. Ndaní kpá 'yì í'bí mbófo éyi zí 'yì e wá, zíye ndìşí óto royé 'duo káa zí éyi bi romoní do 'yì e go ví, gi zí kéyi née, ledre 'bi Lomo ndaá zíye owóowó wá. ³ 'Bú 'yì e ndaá doyé wá. Ndaní 'yì ótoómo ledre zí 'yì e wá. Ambá ledre eyé lá likpí, zíye ndìşiyé méngi ledre e 'duo faa káa

zí éyí bí simi doyé sinyí go misínyí ní, sókú ni royé 'duo sága, iliní bilámá ledre wá. ⁴ Ndaá kpá lá òdú ledre máa yée ga gére née wá, niyí kpá 'yì í'bí ngbángá 'yì e zí bisinyí 'yì e. Ndişiní méngi ledre e 'duo faa somúní eyé sogo a kí wá, zíye ndişi sîkpî fúndúye 'dága simi ledre e za mbá, somúní do Lomo wá, mongú ledre eyé òdú rokinyi eyé bí iliní ní. ⁵ Owú 'bí amáa, máúku zíyi, ídí ígí royí gî ro 'yì e káa zí ga gére née 'dá'ba. Londoní royé kídí, yée niyí 'yì lódú kací Yésu, í'í, née gbékpî ledre, miméngi ledre eyé ni yì ené fú lá bisinyíne, gî zía Lomo ndaá 'bí ené kíye wá.

⁶ Ngíti géyi ndişiní ndéré 'be 'bí 'yì e kí sinyi do kará ga bí kí sómú ledre eyé cúku'dée ní, gî ro zí kará máa ga gére née ndişiye méngi ledre ga bí yée iliní ní. ⁷ Kará ga gére née iliní tí gî ro zíye ówo ledre gî simi 'dódo ledre bí gî simi miéké kúrú Lomo ní, iciní royé má, utúasání ndíki a wá. ⁸ 'Yì ɾanga ga gére née ndişiní tóro'dútu misi'di ledre 'bí Lomo gî zí 'yì e cé káa zí bí kóo simi şindî kadra 'bí Músa, Yóna e kí Yombere otoní royé okó ro Lomo zíye ndişiye úkucáyi Músa ní. 'Yì ɾanga ga gére née simi doyé sinyí gî zí lúyú ledre go misínyí gî zía, ledre 'bí Lomo ndaá do mimbé'deyé wá. ⁹ Niyí méngi ledre ga gére née kenée má, kacíye utúasá akpa kie wá, gî zía 'yì e niyí lúrúcáyi yée mbá mlúrúcáyi, cé káa zí bí kóo 'yì e lurúcayiní Yóna e kí Yombere simi şindî kadra máa bí kóo 'bí Músa ní.

Yata lorú gî zí Páwulo zí Timatíyo

10 Owú 'bi amáa, káa zí bi 'dí'bi ledre ga bi kóo mi'dódo yée zíyì ní go, zíyì 'dí'bi míméngì ledre amá e kpá go mbá, zíyì ndísiyì go méngì kényì cé káa zíma. Misi'di bi mándísi lódú kací Yésu kíe, kí mítóromá ga bi ngbúó simi úzu éyì e, kí 'bú 'yì e bi mándísi óto a, nda kí útusiimi ga bi mándísi útú yée mbá ní, ídí ndísi méngì ledre máa ga gére née kpá té kenée ndéré kíe 'dá'dá za fí. 11 Lúru aka lá ledre ga bi kóo menginí royé zíma, 'yì e sogóní máa, do ndísiyé 'dó'do máa kí toso 'do'dó e mĩngúngúcu ní. Nda kpá kí wo bi menginí máa kíe simi Ánatiyoko kí Ikoníyomo kpá kí Lísitra ní. Simi ledre ga gére née mbá, Ngére Yésu ootomo máa wá. Ndísi kóo kpá fú sáká máa gí simi ledre ga gére née za mbá. 12 Máuku zíyì ma'díi, 'yì ga bi ngununí Kírésito Yésu go káa do Ngére eyé, i'bíní royé go ndísi lódú kací a ní, ezeokó Yésu niyí ndísi 'dó'do 'yì 'bi Yésu ga gére née, gí zía bi ngununí ledre Yésu ma'dáa go ní. 13 Bisinyí 'yì ranga ga gére née, niyí yóko royé kí ngíti géyì lafúye do ídíye tú'dú, zíye ndísiyé síní do tú'dú 'yì e káa bi niyí ídí 'yì ndísi lódú kací Yésu ke.

14 Gí zí kényì née ní, ledre 'bi Ngére ídí ngbóro simiyí ndéréne fú 'dá'dá. Ledre ga bi kóo 'dodoní yée zíyì ní, ídí lánýá royé kíngaya. 15 Káa zí bi kóo tonóní 'dódo ledre 'bi Lomo go zíyì kú gí do owúyì, zíyì ówoyème miéké kúrú Lomo go bilámáne, bi karaba ndísi go í'bí komokenzì zíyì, zíyì ndísiyì lódú kací Kírésito Yésu kíe gí ro zíyì ídíyì trídriyì za fí ní. 16 Ledre máa ga gére née, 'Dówú Lomo 'dodo kóo yée ne do ékéómo yée

gi ro zíye ídíye bilámá misi'di 'bi 'dódo ma'díi ledre zí 'yi e. Kpá gi ro do ndịsi ụçuómo 'yi e ḱe káa bi niyí ndịsi lúyú ledre ke. Ndaá kpá lá duụ wo née wá, ni kpá gi ro togú 'yi luyú ledre go yá, do 'dózoýéme wo ḱe. Kpá gi ro 'dódoýéme misi'di 'bi bilámá ndịsi ḱe zí 'yi e. ¹⁷ Née misi'di bi 'Buzé Lomo yeme gi ro do ndịsi yéme zée 'yi kasa ga bi 'bi Ngére Yésu ní ḱe, gi ro zíze ndịsízé méngi duụ ledre ga bi utúasání miútúásá ní.

4

Yata lorụ zí Timatíyo

¹ Timatíyo, ba ledre bi o'bu mió'bu ní. Ídí óto a simi doyi, ndaá lígi yi wá. Mindá'baógu Yésu ndaá owú ledre wá. Yésu ni ndá'baógu 'dəcị ngbanga 'yi e za mbá. Yée ga bi niyí aka tridri ḱi yée ga bi uyuní go ní. Gi zí ḱeyi née, zíma énzị komoyi 'desi do bi kací 'Buzé Lomo ḱi Kírésito Yésu ma'dáa. ² Ídí í'bi royí ḱingaya ndịsi 'dódo ledre 'bi Lomo zí 'yi e. Zíyi ḱi énzị komoyé. Idíní ndịsi méngi duụ ledre ga bi bi ni ndịsi éme ro Lomo gi zíye miéme ní. Ndaní lúyú ledre wá. Ídí ndịsi 'dódo ledre née kenée zí 'yi e ḱi mimbé'deyi ḱi'do. ³ Gi zía sındi kadra ni ógu, 'yi e niyi ési'dutu mbíliye ngbúru ḱi úwú ledre 'bi Lomo. Zíye óto komoyé yi eyé duụ ndịsi úwú ledre ga bi ngára ndaní 'bi Lomo wá ní ḱingaya. Gi zía née ledre ga bi iliní yi eyé yée ní. ⁴ Niyi ási gi ro cóngó 'dódo ledre bi 'bi Lomo ní kenée, do nda óto komoyé ro gbékpí bicayi 'dódo ledre ga bi ngára ndaní 'bi Lomo wá ní. ⁵ Kací kadra

za mbá, ídí ndịsị tóro ngbúó, mímbe'deyí idí ídí dụú ro moko 'bì Lomo bì do sílíyí ní, gị ro zíyí ndịsịyí 'dí'biógu 'yì e zí Ngére Yésu.

⁶ Máúku ledre ga gére née zíyí kenée, gị zía kacíma akpa do sogo káńgá go, mááyí nda go káa zí kadra tagá ní, mááyí go gbóo gị ro ndá'balúgu romá zí 'Buzé Lomo komo ere.

⁷ Moko bì kó'dúma ní, máméngiǝnzó go. Máódó mímbe'demá zíma méngi a za kí simimá mbá, gị do oduné tí káa zí bì Lomo, mịngi moko ma'dáa ili ní. ⁸ Gị zí kéyí née ní, Lomo ma'dáa yemeomo bilámá bi go zíma 'be 'bì ené komo ere, gị zía miútúásá go kací komoa káa do mbigí 'yì ené. Ngére Yésu ni 'dí'bióto máa née do bilámá bi máa née. Ndaá kpá lá dụú máa ngúcumá wá, azé ídí kí 'yì ga bì ngununí ledre Yésu go, otoní royé go ndịsị lódú kací a gị simi sịndi kadra bi karanée Yésu ma'dáa ni ndá'baógu simi a ní.

Páwulo ndolo Timatiyo

⁹ Timatiyo, méngi aka kéyí zíyí ngásáóguyí zíma yáa 'diya. ¹⁰ Éyí bì Démasi e kí Kiriséne e kí Tító e menginí ní, ndaá bilámáne wá. Bayiomoní moko bì Lomo i'bí zíye ní go. Démasi nderé go simi Tasaloníka, Kiriséne nderé 'bì ené go simi Galatíya, Tító ndéré 'bì eyí simi Dalamatíya. 'Yì ga gére née mbá, 'bú ledre 'bì sága ba 'di'bioyó yée go. ¹¹ Idiakázé nda yáa go lá dụú gbre kí Lúka. Togú áyí giri go ógu yá, ndá óyó sogoyí zí Máriaiko wá, 'dí'biútú wo giri kpa, gị ro zía óguné ndịsị sáká máa, ¹² gị zía máíli aka kása Takíka simi Éfeso. ¹³ Simi bì

togú áyí girí go ìnyì ní, mongú bongó drú amá kóo máótoómo lígì sìmì Tóra 'be 'bì Karapó ní, 'dí'biútú girí kpa zíma. Kpá kí miéké kúrú Lomo ga bì kóo máótoómo yée ìrì ní, 'dí'biútú yée girí kpá kpa zíma.

¹⁴ Éyí bì Alakizánde 'yì 'boro mengì zíma ní, sinyí romá go gbála. Máútúásá méngìlúgu bisinyí ledre zía kací ledre bì mengì zíma née wá. Odu a, Ngére Yésu idí lúru bì zía sìmì ledre máa née dujú ne. ¹⁵ Komoyì idí idí royì gì zí Alakizánde ma'dáa. Oto roné go okó rozé, ndìsì go úkucáyi ledre gì do bi ledre 'bì Lomo bì ndìsìzé 'dódo a zí 'yì e ní kíngaya.

¹⁶ Sìmì mìzefì 'dí'bi bì kóo 'dì'biní máa ógu kíma kó'dú 'yì 'dècì ngbanga e gì zía bì mándìsì 'dódo ledre 'bì Ngére Yésu zí 'yì e ní, bikérì 'yì bì kóo i'bí roné útúne do kacíma ndéré úku yéme ledre gì romá ní ndaá. Abú mengìní kóo bisinyí ledre zíma kenée ndotó, Lomo ndaá méngìlúgu bisinyí ledre zíye kací a wá. ¹⁷ Sìmì ledre máa bì kóo née mbá, Ngére Yésu otoomo ené kóo máa wá. Nì kóo fú kíma, ndìsì kí í'bí roko'bù zíma, zíma ndìsì má úku bilámá ledre ené kíe zí ríkí kífú 'yì e za mbá. Née sì ledre bì kóo yomo máa gì roa gì zí kemì ga gére ní. ¹⁸ Máówo bú, Ngére Yésu nì ndìsì sáká máa gì zí bisinyí ledre fú kenée gì zíma ndéréma ndìsì má sì sùndíja komo ere, gì zía, nì ne Ngére amá. 'Yì e idíní ndìsì mbófo wo kací kadra za mbá, kenée za fí. Idí kenée.

Mandá kè úndru gì zí Páwulo zí 'yì e

¹⁹ Mandá zí Akúwíla e kí me'bené, Purisíla e kí Onésiforú kí 'yì 'bì 'be 'bì eyé e za mbá. ²⁰ Sìmì bì kóo máìnyì ógumá sìmì Róma ní, Erésito idíaká kóo cìkì sìmì Koríndo, zíma nda kóo ótoómo Tarafímo sìmì Meléto gí zía nì kí ndíyá. ²¹ Odu ledre, ndá lú'bú wá, idí méngì kényì, zíyì óguyì 'dá'dá zí iní kí ndá'baóguné. 'Yì ga bì 'bì Ngére Yésu azé kéye yáa ní, Yubúla e kí Pódene e kí Lino e kí Kùlída e, I'bíní mandá zíyì kíngaya.

²² Ngére Yésu idí idí kíyì, zía í'bí úndru zíse za mbá.

MIKÁNDA LORU 'BI LOMO KÍ DOSÍ ÉYÍ E
Baka: MIKÁNDA LORU 'BI LOMO KÍ DOSÍ ÉYÍ E New
Testament+

copyright © 2016 Wycliffe Bible Translators, Inc.

Language: Baka

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

9ebc1b62-650d-5302-9391-27a31d140102